

30. Evropsko-saobraćajno obrazovno takmičenje

Kao i proteklih godina ekipa BIHAMK-a, koja je predstavljala našu zemlju na 30. Evropskom saobraćajno-obrazovnom takmičenju ostvarila je očekivano odličan rezultat i plasirala se među prvih šest ekipa u Evropi

Ovogodišnje 30. FIA Evropsko saobraćajno-obrazovno takmičenje učenika osnovnih škola održano je u periodu od 03. do 06. septembra 2015. godine u Beču (Austrija).

U veoma jakoj konkurenciji, ekipa BIHAMK-a koja je predstavljala Bosnu i Hercegovinu, osvojila je 6.mjesto i time nastavila sa tradicijom postizanja izuzetno dobrih rezultata. Poslije ovog takmičenja jasno je da plasmanom među prvih deset ekipa posljednjih godina BIHAMK spada u evropske klubove koji imaju kontinuirano visoku poziciju, što znači kontinuirano kvalitetan rad sa djecom u osnovnim školama. Ekipu BIHAMK-a predstavljali su Amila Mujkanović (Lukavac), Jasmina Graho (Konjic), Ante Šteko (Tomislavgrad) i Ahmed Musić(Sarajevo).



Na ovogodišnjem takmičenju održanom u Beču, 4. Septembra/rujna , nastupili su predstavnici 22 kluba iz 21 evropske zemlje (Albanija, Austrija, Bosna i Hercegovina, Bugarska, Hrvatska, Mađarska, Finska, Francuska, Češka Republika, Srbija, Rusija RAF, Rusija RAS, Litvanija, Norveška, Crna Gora, Njemačka, Slovačka, Švicarska, Poljska, Monako, Latvija i Slovenija. Takmičenje je ponovo održano po tzv. "rotacijskom" sistemu. Svi takmičari su nastupili na osam takmičarskih stanica (disciplina), od ukupno četrdesetak disciplina koje su do sada definisane i sa kojima ćemo se susretati na narednim takmičenjima.



Inače, ovom takmičenju prethodio je ciklus saobraćajno-obrazovnih takmičenja u našoj zemlji, koji je realizovan prema planu Komisije za saobraćajna takmičenja BIHAMK-a. Tokom marta i aprila u svim područjima su izvršene selekcije na školskom i općinskom nivou. Sva područna takmičenja su održana tokom aprila i maja, dok je završnica održana u Bihaću 30. i 31. maja, kada je organizovano 19. Finalno saobraćajno-obrazovno takmičenje "Bihać 2015". Nakon predkvalifikacionog i kvalifikacionog takmičenja, a na osnovu pojedinačnih rezultata takmičara određeni su predstavnici BIHAMK-a.



Svečanom otvorenju takmičenja, koje je bilo na veoma visokom nivou i jako dobro organizovano, prisustvovali su i visoki zvaničnici FIA (Međunarodne Automobilističke Asocijacije) - Predsjednik FIA Jean Todt, predsjednik FIA Regije I Thierry Willemarck, Generalni direktor FIA Regije I Jacob Bamsgaard, kao i zvaničnici automobilističkog kluba Austrije ÖAMTC i grada domaćina.

Ekipe Rusije predstavnici auto kluba RAS osvojila je prvo mjesto, drugoplasirani su bili takođe reprezentativci Rusije predstavnici auto kluba RAF, dok je treće mjesto zauzela ekipa Latvije predstavnici auto kluba LAS.